

Edificio ex-Hotel Colombia, otro edificio monumental cu ta habri su portanan pa publico mañan

ORANJESTAD(AAN)-- Durante di e Paseo, Edificio ex-Hotel Colombia, situariba Zoutmanstraat 13-15 den Oranjestad, tambe ta habri su portanan for di 10'or di mainta riba diadomingo 14 di september venidero.

Informacion di ex-Hotel Colombia:

Hotel Colombia ta un edificio consistiendo di dos piso, ubica riba un parcela di un tamaño di 1010 m². E ta situa na e crusada di Zoutmanstraat y Oranjestraat. A construi e edificio aki na 1918 y e tawata propiedad di Señor L.J.M. 'Nadie' Henriquez y na e momento ey e tawata un di e edificionan di mas bunita di Oranjestad, cu su balcon y su pilarnan. Na 1919 Nadi Henriquez a cuminsa cu un cinema den aire liber. Na december 1920 Henriquez a cambia e cinema aki cu Sr Eduard de Veer pa su pianola. Na 1922 ainda Sr. de Veer tawatin e cinema, cu por cierto tawata fungi tambe como un teatro. Despues a uza e edificio pa Pension Aruba. Alrededor di año 1925 dr. J.E.M. Arends a cumpra e edificio.

E prome destinacion di e edificio tawata uza tanto pa Consulado di Venezuela como pa residencia di e consul. Siguiientemente tawata yama e edificio Hotel Colombia, cual segun Hartog (bibliotecario/investigado/escritor) tawata e prome hotel di Aruba. Otro destinacion cu e piso abou tawatin, tawata pa Imprenta Excelsior na año 1953 y como ultimo el a fungi como 'The Wine Cellar'. Despues cu pais Aruba a adkeri e edificio el a deteriora den transcurso di tempo. El a sirbi como refugio pa adicto y despues di un candela, na unda e dak a keda irreversibelmente dañá el a bira un ruina.

E dos edificionan, tanto Residencia Eloy Arends como ex Hotel Colombia, desde 30 di juni 1999 tawata propiedad di Fundacion Fondo di Monumento. E restauracion di e edificionan a cuminsa dia 17 di februari 1997, bou supervision y coordinacion di e Oficina di Monumento y a finalisa



exitosamente riba 3 di april 1998. E compania di arkitekto encarga cu ehecuion di e proyecto aki tawata Plan D'2 (ir. E. Matthew) y e contratista tawata Albo Aruba N.V. E restauracion a costa alrededor di cinco milyon florin. Tur dos edificio monumental, incluso e expansion moderno, ta sirbi como Registro Civil y Censo. Den Residencia Arends ta tene ceremonia di matrimonio civil den e salanan representativo, mientras cu den e ex Hotel Colombia ta otorga cedula. E expansion moderno entre e dos edificionan monumental a ser construi segun e filosofia di restauracion reconocida pa ICOMOS (International Council of Monuments and Sites). Den e parti nobo aki bo por acudi pa hña paspoort, certificado di censo, etc.

E arkitekto Sr. Earon Matthew di Plan D'2 N.V. hunto cu su team di su oficina lo duna e recoridonan na Stadhuis y ex Hotel Colombia, durante di e Paseo Monumental IV 2014.

Ministerio di Cultura, Oficina di Monumento y Comision Paseo Monumental ta invita henter e pueblo di Aruba y amantenan di monumento pa haci uzo di e oportunidad aki pa participa na e paseo monumental di e año aki y ban apoya, duna bator na nos cultura y nos herencia cultural y cera conoci cu e tecnica den arkitektura cu a ser uza den nos monumentonan.

Warda e articulo aki y sigur por uza esaki como fuente durante Paseo Monumental IV 2014.